

## Dess lieve Geld

Om letzde Somsdaach hawwe de Karl unn ich vorm Owendesse beim Hersch uff de Terrass gesotze unn hawwe noch schnell e paar Ebbelwoi gepetzt, was sollsden bei dere Hitz aach onnerst drinke.

Ich habb noochem ersde Glas de Karl gefroocht: Hosde was vom Schorsch unn soiner Fraa geheert? Die zwaa sinn doch seit acht Daach im Bayrische Wald.

Ei ja, sacht de Karl, ich habb gestern mett dene ihrne Tochter geschwetzt unn die hott merr verzehlt, sie hätt om Mittwoch ihr Eltern oogerufe, weil dess iss joo e mords Streck mettem Audo ze fahrn unn doo wolltse schunn gern emol wisse, ob alles in Ordnung iss mett dene zwaa.

Unn, habb ich gemoont, dene gehts doch bestimmt gut. Wie ich de Schorsch unns Kättche kenn, fahrn die vill mettem Audo erum unn duen gut esse unn drinke.

De Karl hott genickt: Ess detene gut gefalle. Awwer sie wolle nor zeh Daach bleiwe statt wie sunst drei Woche.

De Ober iss grad vorbeikumme, doo habb ich noch ooner bestellt unn sach: De Schorsch hott merrs verzehlt. Weilse doch im Herbst noch so e Fünfdaachestour mettem Bus mache wolle.

De Karl hott e gonz ernst Gesicht gemacht: Honnes, ich glaab, mir misse all sparn. Wennde jeden Daach siehst unn heerst, was die so mett uns Rentner mache wolle - wenn dess so weider geht, dann könne merr grad noch ferr acht Daach im Johr in Urlaub fahrn unn misse froh soi, dass merr noch genuch ze esse unn ze drinke hawwe. Unn zum Dokter gehe könne merr dann aach nimmi so oft, dess soll joo aach immer mehr koste. Dissjohr kimmt dess Wetter noch dezu, die hawwe schunn geschriwwe, dasses Obst, ess Brot unn aach ess Bier deirer werrn det.

Ich druff: Karl, du host recht, mir misse sparn. Merr kann joo aach nit so vill von dem ausgewwe, wassmer uff Reserve hott. Waaßt du, wievill de noch brauchst, wenn du odder doi Fraa emol kronk werrd unn villeicht ins Pflleecheheim musst? Doo geht om End nochs Heisje druff.

De Karl hott en große Schluck genumme: Ich glaab, dess Sparn fengt schunn in de Wertschafte oo. Unn uff de Feste, die ewe iwverall sinn, gibts aach immer mehr von dene die jammern, weilse nit uff ihr Kosde kumme. Doo sache se immer „Geiz iss geil“, awwer villeicht isses gar koon Geiz, wenn die Leit ihr Euro zähle, villeicht hawwe merr allminonner nimmi so vill Geld zum Ausgewwe ferr Jux unn Dollerei.

Honnes, sacht de Karl, bezahle merr emol, ich muss hoom zum Esse. Unn ich will die Nachrichte gucke, weil ich kennt mich immer fortschmeiße wenn ich seh unn heer, wie die uns Kloone robbe wolle unn selbst mett de Eichele erumschmeiße.

Ich habb gonz dumm geguckt: Wer schmeißden mett was ferr Eichele erum?

Doo lacht de Karl: Ei die Politiker! Unn als ich noch immer nit wusst wasser wolt, doo sacht er: Ei waaßde dess nit – oon Eichel iss e Milljard. Unn mett dene schmeiße die Herrn doch nor so um sich. Ich bin nor emol gesponnt wie longs dauert bis die merke, dass e Milljard Euro zwaa Milljarde Mark sinn.

Eiern Honnes